

DIDZA' GUSÓL-LĒ'Ē PABLO YÖDZÖ COLOSAS

Pablo rugapë' Dios bönachi queë' Cristo nacu'ë Colosas

1 ¹ Neda', Pablo, naca' gubáz queë' Jesucristo tu' ré'ënë' Dios caní, ate' dzágabi' bi'i bóchi'ru' Timoteo neda'. ² Rugapa' Dios libí'ili', zóali' Colosas. Nácali' bóchi'tu' réajlë'ëli' Cristo, en nácali' quez queë' Dios. Rinábida'-në' Xúziru' Dios uzá' ládxë'ë queëli', en gunë' ga soa dxi icja ládxi'do'oli'.

Pablo rulidzë' Dios, en rë' Lë': "Xclenu"

³ Rética'stu'-në' Dios, Xuzë' Xanru' Jesucristo: "Xclenu" cate' rulidztu'-në' Dios, en rinábitu'-në' bi gunë' queëli' ⁴ tu' biyónitu' didza' ca réajlë'ëli' Jesucristo, en ca nadxí'ili' yúgu'të nupa néquiguequi quez queë' Dios. ⁵ Caní runli' tu' runli' löza le nuzóë' Xanru' queëli' ni' yehua' yubá, lë na' biyónili' que cate' bé'lentu' libí'ili' didza', le naca löza sí'ili' ni'a que didza' dxi'a. ⁶ Didza' dxi'a na' bidxín queëli' ca ridxín ca' idútë yödzölió. Run dxin, en raca libán que, idútë yödzölió, la' tuz ca raca ga zóali', dza ni'te ga ridxintë na'a dza, cate' ni' biyónili', en bénbë'ëli' idútë le ruzá' ládxë'ë queëru' Dios. ⁷ Epafras, bönni' nadxí'iru'-në', busédinë' libí'ili' lë ni. Lë' rúnlenë' netu' tsözxón dxin, en rácalenë' libí'ili'. Náquië' huen dxin idú queë' Cristo. ⁸ Bönni' ni gudíxjöi'inë' netu' ca nadxí'ili' luzá'ali', ate' runë' Dios Bö' Lá'ayi ga gaca gunli' caní.

⁹ Que lë ni na' netu' ca', dza ni'te ga ridxintë na'a dza, tu' réquibe'etu' lë ni, biti' ca' rizóa dxitu' rulidztu'-në' Dios, en rinábitu'-në' gácalenë' libí'ili', en gunë' ga gúnbë'ëli' idú le ré'ëni quézinë' Lë', en gunnë' queëli' yúgu'të yöl-la' rácada', en yöl-la' réajni'i le rigu'ë Dios Bö' Lá'ayi rë'u. ¹⁰ Caní rinábitu'-në' para gaca gunli' ca ral-la' ilún nupa néquiguequi queë' Xanru', gunli' yúgu'të le raza ládxë'ë Lë', en séqui'li' gunli' yúgu'të le naca dxi'a, en gácarö idú ca núnbë'ëli'-në' Dios.

¹¹ Rinábitu'-në' utipë' ládxi'li', en gunnë' queëli' yöl-la' huáca idú queë', para gaca guá' ilenli' yúgu'të, en cózali' zxön ladxi', en udzeja ládxi'li'.

¹² Lu yöl-la' rudzeja queëli' guli'guíë' Dios Xuz: "Xclenu", tu' budödë' lu ná'aru' gata' queëru' lataj lu bení' queë', en gunru' tsözxón nupa néquiguequi quez queë'. ¹³ Dios Xuz na' busölë' rë'u lu na' nu rinná bë' lataj chul-la, en budödë' rë'u ga na' rinná bë'ë Zxí'ini cazë', Nu nadxí'inë'. ¹⁴ Zxí'inë' na' böá'uë' rë'u, tu' gútië' uláz queëru', ate' buniti lahuë' rë'u ca naca dul-la' gubága'ru'.

Nuhuóácaru' tuz len Dios tu' gútië' Cristo uláz queëru'

¹⁵ Cristo náquië' tuz ca náquië' Dios caz, Nu biti' gaca ilé'eru'. Zoa cazë' Lë' zí'atëlö ca yúgu'të le benë' Dios. ¹⁶ Lu në'ë Cristo benë' Dios

yúgu'të le dë, le nacuá' lúzxiba, en le nacuá' luyú, yugu' le rilé'eru', en yugu' le cabí gaca ilé'eru', lë na' nácagaca lataj lo, en yugu' yöl-la' unná bë', en le nápagaca yöl-la' zxön, en yugu' yöl-la' huáca que yehua' yubá, en que luyú ni. Yúgu'të benë' Dios lu në'ë Cristo para uzi'ë xibé Lë'.

¹⁷ Cristo zoa cazë' zí'alö ca yúgu'të le dë, ate' yúgu'të nacuá'tica'sö ni'a queë' Lë'. ¹⁸ Cristo náquië' Xángaca bönachi queë', en runödzjë' quégaquië' yöl-la' na'bán. Náquië' ca' Nu gusí lo bubán tsaz lu yöl-la' guti. Zí'alö Lë' bubanë' tsaz lu yöl-la' guti para tsépisëtërë' ca yúgu'të le dë. ¹⁹ Caní guca, tu' guyaza ládxë'ë Dios Xuz sóalen Cristo idútë le naca cazë' Lë'. ²⁰ Ni'a que le benë' Cristo, Dios benë' ga gaca ulu'huóaca tuz len Lë' yúgu'të le dë, le nacuá' luyú, en le nacuá' lúzxiba. Bunë' léguequi tuz len Lë' tu' bulaljë' Cristo xichönë' cate' gútië' lë'e yaga cruz.

²¹ Libí'ili', zí'atëlö nulá'alenli'-në' Dios, en gúcali' ca yugu' bönni' biti' ta'lé'enë' Dios dxi'a lu icja ládxi'do'oli' ni'a que dö' biá'ali', pero na'a chibunë' libí'ili' tuz len Lë'. ²² Caní guca, tu' budödi cuinë' Cristo, en gútië' uláz queéli' para gaca usudxinë' libí'ili' lahuë' Dios, nácali' quez queë', en idú dxi'a, ate' cuntú nu bi gaca inné' queéli'. ²³ Caní gaca channö ugá'anali' tsutsu ca réajlë'ëli' Cristo. Gácali' ca tu yu'u zxoa ga rë' xilibi zö'ö que, en biti' tseaj bö' ládxi'do'oli' ca runli' löza didza' dxi'a biyónili', lë na' raca libán que idútë yödzölió le benë' Dios zxa lúzxiba. Dios buzöë' neda', Pablo, para gaca' huen dxin que didza' dxi'a na'.

Dxin budödë' Dios lu në'ë Pablo

²⁴ Rudzéjada' na'a ca naca le riguí'i rizáca'a para gácalena' libí'ili', en ruúdxí rizá'a lu idútë le naca' le riguí'i rizáca'lëna' tsözxón Cristo uláz que idú le naca cazë' Lë', le naca bönachi queë'. ²⁵ Dios benë' ga naca' huen dxin quégaca bönachi queë' Cristo, ate' runa' xichinë' Dios, le budödë' lu na'a guna' para gácalena' libí'ili', quíxjö'a idú ca naca xtídzë'ë Dios. ²⁶ Ruzéajni'ida' bönachi le nagachi', lë na' bigachi' dza ni'te, ate' cuntú nu benbë' le, pero na'a Dios chibuluí'inë' bönachi néquiguequi quez queë' ca naca que. ²⁷ Dios gú'uni quézinë' gunë' ga ilúnbë'e yugu' yöl-la' tsahui' idú que le nagachi' ni, lë na' ta'yöni bönachi izá'a. Caní rnna lë na' bigachi': "Cristo náquië' tuz len libí'ili', en náquië' le naca löza idéli'li' tsazli' lu bení' queë'."

²⁸ Runtu' libán queë' Cristo, en rusá'atu' ládxi'gaca yúgu'të bönachi, ate' ruséditu' léguequi idútë yöl-la' réajni'i, para gaca usudxintu' yúgu'të bönachi lahuë' Dios, naca idú ládxi'gaca tu' nácagaca tuz len Jesucristo. ²⁹ Para gaca caní runa' dxin, en ruí'i ládxa'a údxi guna' lë ni, rugúna' dxin yöl-la' huáca idú na' runnë' Cristo quia'.

2 ¹ Ré'ënda' inózili' ruí'ida' ládxa'a runa' le gácalen libí'ili', enca' le gácalen bönachi yödzö Laodicea, en le gácalen ca' yúgu'të nupa

biti' ila'lé'eni neda'. ² Runa' caní para ila'dipa ládxi'gaquië', en iláquië' tuz lu yöl-la' nadxí'i, en ulu'zi'ë xibé yúgu'të yöl-la' tsahui' que yöl-la' run löza idú le runna yöl-la' réajni'i queëru'. Caní raca para ilúnbë'ë le bigachi' queë' Dios Xuz, lë na' naca cazë' Cristo. ³ Lu në'ë Cristo ruzí'iru' xibé yúgu'të yöl-la' tsahui' que yöl-la' rácada', en yöl-la' réajni'i. ⁴ Lë ni rea' libí'ili', para cabí gaca nu si' ye'e libí'ili', nu güí'i didza' tséajlë'ëru' le cabí nácatë. ⁵ Sal-la' zoa' zi'tu' ga zóali' lu idútë le naca', lu bö' naca caza' zóalena' libí'ili', en rudzédada' tu' rilé'eda' rö'ö xibá queëli', en nácali' tsutsu ca réajlë'ëli' Cristo.

⁶ Que lë ni na', ca na' guzxi' lu ná'ali' Xanru' Jesucristo, lësca' caní ral-la' gunli' yúgu'të le gunli', dzáguië' Lë' libí'ili'. ⁷ Ca na' nun ga rë' luí yaga, enca' ca na' nayás zö'ö lu xilibi zö'ö, guli'sóalen Cristo. Guli'sóa tsutsu ca réajlë'ëli' Lë', ca na' chinazédali'. Guli'guíetica'së' Dios: "Xclenu'."

Le cubi nácaru' tu' dzágaru'-në' Cristo

⁸ Guli'gún chi'i cuinli' para cabí güí'ili' lataj nu si' ye'e libí'ili', nu ugún dxin yöl-la' réajni'i quégaca bönachi, en yugu' didza' ta'nnasë' nácacaca idútë li, ca naca le ta'llëbi tun bönachi, en ca naca le tu'sedi bönachi le naca que yödzölió ni, en calëga le naca xtídzë'ë Cristo.

⁹ Idútë le naca cazë' Dios zóalen Cristo sal-la' böáquië' bönachi, ¹⁰ ate' libí'ili' nápalí' idútë le náquië' Dios tu' dzágali'-në' Cristo, Nu rinná be'e yúgu'të nupa ta'nná bë', en yugu' bönni' dë lu ná'agaquië'. ¹¹ Narugu lu xipéla'gaquië' bönni' judío le ruluí'i dá'gaquië' Dios, pero libí'ili', tu' dzágali' Cristo, zóalen libí'ili' le ruluí'i néquili' queë' Dios, le cabí néquini lu ni'a lu ná'agaca bönachi. Yugu' bönni' judío tu'güë' tu guídido', pero libí'ili', nadúa idútë yöl-la' bönachi queëli' le bënlenli' dul-la'. Caní naca queëli' tu' benli' tsözxón Cristo cate' gútië' lë'e yaga cruz. ¹² Cate' bidí'fali' nisa guca ca bigáchi'lenli'-në' Cristo tsözxón yeru ba, en bubánlenli'-në' tsözxón tu' guyéajlë'ëli' Dios, len yöl-la' huáca queë' busubanë' Cristo lu yöl-la' guti. ¹³ Zí'atëlö gúcali' ca nupa chinátigaca tu' nözi dul-la' gubága'li', en biti' guzóalen libí'ili' le ruluí'i néquili' queë' Dios, pero na'a Dios nunë' ga nabánlenli'-në' tsözxón Cristo, en buniti lahuë' libí'ili' ca naca yúgu'të dul-la' gubága'li'. ¹⁴ Dios busúluë' yugu' le nabága'ru' le nazúajgaca lu xibá queë', lë na' tu'zegui rë'u didza'. Bugúë' lë na' nabága'ru', en budé'ë le lë'e yaga cruz ca tu le nabáguë'ë Cristo. ¹⁵ Cate' gútië' Cristo lë'e yaga cruz, bugúë' yöl-la' huáca unná bë' quégaca bö' xihui' unná bë', en quégaca bö' xihui' dë lu né'eguequi yöl-la' huáca, tu' bulu'e lahui le nácacaca bö' xihui' na', en bugúë' idutë le guta' lu né'eguequi.

Ral-la' güí'i ládxi'ru' le naca que yehua' yubá

¹⁶ Que læ ni na', biti' güí'ili' lataj nu uzegui libí'ili' didza' ca naca le rë'aj ráguli', o tu' cabí runli' zxön yugu' dza laní, o tu' cabí runli' zxön beo' si' ruzé, o tu' cabí runli' zxön yugu' dza lá'ayi quégaca bönachi.

¹⁷ Yúgu'të læ ni naca ca tu bixín que le ral-la' gaca, ate' le ruluí'i yúgu'të læ ni náquië' Cristo caz. ¹⁸ Biti' güí'ili' lataj nu gun ga unítili' le ral-la' sí'ili', nu runda' bayudxi ga ilaca nōxaj ládxi'gaca bönachi, en ilún zxön yugu' gubáz lá'ayi. Tu'gutsa' cuíngaquië' le cabí bila'lé'enë', en tun ba zxön cuíngaquië' ca naca le dzó'ösö ícjagaquië' lu yöl-la' bönáchisö quégaquië'. ¹⁹ Nu run caní biti' da' Cristo. Náquië' Xanru', en ruzóë' tsutsu idútë le naca cazë', le nácaru' rë'u. Rugahuë' le, en runë' ga naca tuz ni'a que le zeaj lu dxita lu bin, ate' rizxón idútë le naca cazë' ca ré'ënë' Dios uxönë' le.

²⁰ Libí'ili' chinátilenli'-në' Cristo para cabirö ila'nná be'e xibá que yödzölió libí'ili'. ¿Bizx que runli' tsca ni nácali' que yödzölió, en runli' ca ta'nná bë' xibá que? ²¹ Caní ta'nná yugu' xibá que yödzölió ni:

Biti' quítjanu' læ ni.

Biti' gagu' læ na'.

Biti' canu' ia'tú le dë.

²² Yúgu'të læ ni ila'niti cate' chibugunru' léguequi dxin. Caní nácagaca le ta'nná bë' bönachi, en yugu' xibá nazí' lu né'eguequi. ²³ Le nácatë, yugu' xibá ni, téqui bönachi nápagaca yöl-la' réajni'i. Tun ga tu'luí'i cuínguequi ca bönachi yudo', en ga tu'luí'i cuínguequi nōxaj ladxi', en ga tu'saca' zí'gaca idútë le zeaj naca caz, pero xibá ni biti' ca' tácalen rë'u para gaca inná bé'eru' yugu' le rizé ládxi'ru' lu yöl-la' bönáchisö queéru'.

3 ¹ Na'a, channö nubánlenli'-në' Cristo, guli'güí' ladxi' le nácagaca que yehua' yubá ga ni' rö'ë Cristo cuita læ'ë ibëla Dios, ga náquië' lo. ² Guli'sá' ladxi' le taca xitsá'alö, en calëga le taca luyú ni. ³ Naca queéli' tsca chinátili', ate' yöl-la' na'bán queéli' rapa chi'ë Cristo ga ni' zoa cazë' Dios. ⁴ Cristo nabánili' libí'ili'. Cate' uluí'i lahuë' Lë', ní'irö uluí'i loli' ca' libí'ili' tsözxón len Lë' lu bení' queë'.

Yöl-la' na'bán gula, en yöl-la' na'bán cubi

⁵ Que læ ni na', guli'gún ga ila'niti le nacuá'len libí'ili' que yödzölió ni:

Yugu' le ruá' dö', en le nácagaca xihui',

en yugu' le rizé ládxi'li' le ruá' dö',

en yugu' le rizé ládxi'li' le naca xihui',

en yöl-la' ruhuidi'.

Yöl-la' ruhuidi' naca læbi ca nu reaj ladxi' budó' guió'j budó' yaga, tu' cabí reaj ladxi' Dios nu ruhuidi'. ⁶ Tun bönachi yugu' le caní, ate' gunë' Dios xíguia' yúgu'të nupa biti' túngaca ca rnna xtídzë'ë. ⁷ Yugu' dul-la'

caní benli' ca' libí'ili' cate' ni' nadódili' lu né'eguequi. ⁸ Na'a, bíti'rö gunli' yugu' læ ni:

Bíti'rö idzá'ali', en bíti'rö leli'.

Bíti'rö nu gunli' zi', en bíti'rö inné xíhui'li'.

Bíti'rö innali' le ruá' dö'.

⁹ Biti' si' yé'eli' luzá'ali' tuli' ia'tuli' tu' chinucá'anali' le gúcali' zí'alö, en yugu' le benli' zí'alö. ¹⁰ Chinácali' bönachi cubi, ate' tu tu dza ricúbili', ruhuöácaröli' ca naca Nu na' bun libí'ili', para gún'bè'èli' Lè' idú ca náquiè' Lè'. ¹¹ Tu' chidzágaru'-nè' Cristo:

Bíti'rö nácaru' bönni' zi'tu', en bönni' judío.

Bíti'rö nácaru' bönni' narugu lu xipéla'gaquiè' le naca bè' nu da'

Dios, en bönni' biti' narugu lu xipéla'gaquiè' læ na' naca bè'.

Bíti'rö nácaru' bönni' ta'yéajni'inè', en bönni' biti' ta'yéajni'inè'.

Bíti'rö nácaru' bönni' nadó'ogaquiè', en bönni' biti' nadó'ogaquiè'.

Na'a, Cristo náquiè' yúgu'tè le nácagaca lesaca', en dzáguiè' yúgu'tèru'.

¹² Dios nadxí'inè' libí'ili', en guröè' libí'ili' para guéquili' quez queè'. Que læ ni na', ral-la':

Güi'i ládxi'li' luzá'ali', en gácali' dxi'i ladxi',

en nöxaj ladxi', en cuidi' ladxi',

en cózali' zxön ladxi'.

¹³ Channö raca didza' bizxaj tuli' len ia'tuli', guli'guá' ilén luzá'ali' tuli' ia'tuli', en buli'niti lo luzá'ali' tuli' ia'tuli' ca na' benè' Cristo, buniti lahuè' libí'ili'. ¹⁴ Le nazáca'tèrö ca yúgu'tè læ ni, ral-la' idxí'ili' yúgu'tè bönachi, tu' naca yöl-la' nadxí'i le run ga nácaru' tuz, en ga nácaru' idú.

¹⁵ Guli'güí' lataj le ribequi dxi icja ládxi'do'oru' inná bè' lu icja ládxi'do'oli', læ na' runnè' Dios queéru'. Que læ ni na' bulidzè' libí'ili', para gácali' tuz lu idútè le naca cazè' Cristo. Guli'guíè' Dios: "Xclenu'."

¹⁶ Guli'sí' lu ná'ali' xtídzè'è Cristo le gaca queéli' tu yöl-la' tsahui' zxön. Tu' zóalen libí'ili' yöl-la' réajni'i queè' Dios, buli'sedi, en buli'zéjni'i luzá'ali' tuli' ia'tuli'. Idú ládxi'li' guli'gul-la yugu' salmo queè' Dios, en yugu' le rul-la yöl-la' ba, en yugu' le rul-la lá'ayi, ate' guiéli'-nè' Dios: "Xclenu'." ¹⁷ Yúgu'tè le runli', le naca didza' ruí'ili' o le naca dxin runli', guli'gún yúgu'tè lu Lè' Xanru' Jesús, en guiéli'-nè' Dios Xuz: "Xclenu'", dzáguiè' Cristo libí'ili'.

Le ral-la' gunru' que luzá'aru' tu' néquiru' queè' Cristo

¹⁸ Libí'ili', nigula nutsaga ná'aleni' bönni' queéli', guli'gún ca rna xtídzagaquiè' bönni' que queéli' ca ral-la' gunli', tu' néquili' queè' Xanru'.

¹⁹ Libí'ili', bönni' nutsaga ná'aleni' nigula queéli', guli'dxí'i nigula que queéli', en biti' uzéli' bach légacanu.

²⁰ Libí'ili', bi'i ra'bán,
guli'gún ca rnna yúgu'të xtídza'gaquië' xuz xiná'ali'.
Lë ni raza ládxë'ë Xanru'.

²¹ Libí'ili', núlöli' nácali' xúzgaca bí'ido',
biti' tödi bë' usína'li' zxí'inili',
para cabí huóaj ládxi'gacabi'.

²² Libí'ili', núlöli' nácali' bönni' nadó'ogaquië',
guli'gún ca rnna yúgu'të xtídza'gaquië' xanli' luyú ni.
Calégasö gunli' caní cate' tu'yúë' libí'ili'
ca na' tun nupa té'ëni ilún ga ila'yaza ládxi'gaca bönachi,
pero idú ládxi'li' guli'gún xichíngaquië'
ca ral-la' ilún nupa tadxi Dios.

²³ Ca naca yúgu'të le runli', guli'gún idú ládxi'li',
gaca ca runli' xichinë' Xanru',
en calégasö ca runli' xichíngaca bönachi.

²⁴ Chinóz quézili' ubi'ë Xanru' queéli',
gunnë' queéli' le chinupé'ë Dios quégaca nupa nácgaca zxí'ini cazë'.
Caní gaca, tu' runli' xichinë' Xanru' Jesucristo.

²⁵ Nu ruá' dö', ubi'ë Xanru' que nu na' ca naca dö' ruá' nu na', tu' cabí
utsé'ë Dios ca ral-la' ubi'ë que queégaca bönachi.

4 ¹ Libí'ili', núlöli' nácali' xángaca bönachi,
guli'gún le naca tsahui', en le naca dxi'a
ca rugunli' dxin yugu' bönni' huen dxin queéli'.
Guli'tsöjné zoa ca' Xanli' yehua' yubá.

² Libí'ili', yúgu'tëli',
buli'lídzatica'së' Dios.
Buli'subán ládxi'li' ulídzali'-në' Dios,
en guli'guíë': "Xclenu'."

³ La' ná'asö cate' rulídzali'-në' Dios, guli'nabi-në' ca' gácalenë' netu',
en gunnë' netu' lataj quíxjö'ötu' xtídzë'ë Xanru', para gaca uzéajni'itu'
bönachi le bigachi' ca naca queë' Cristo. Tu' runa' caní nadzuna' lidxi
guíë ni. ⁴ Guli'nabi-në' ca' Dios, gunnë' neda' lataj usalaj lá'ana' le
bigachi' na' ca ral-la' guna'.

⁵ Lu yöl-la' réajni'i queéli', guli'gún le runli' lógaca nupa biti'
ta'yéajlë' Cristo. Guli'gunda' dxin yugu' dza uzá' ládxë'ë Dios queéli',
gunli' xichinë'. ⁶ Ral-la' güí'ili' didza' ca raza ládxë'ë Dios, en ca ral-la'
gun nupa néquiquequi queë'. Ral-la' inózili' ca' naca ral-la' ubí'ili'
didza', bi guíëli' tu tu bönachi.

Yugu' bönachi queë' Cristo tu'gapa Dios luzé'eguequi

⁷ Tíquico quíxjöi'inë' libí'ili' le raza quia' ni. Náquië' böchi'ru'
nadxí'iru'-në'. Náquië' ca' huen dxin idú queë' Xanru', en rúnlenë' neda'
tsözxón dxin queë' Xanru'. ⁸ Que lë ni na' risól-la'a-në' ga zóali', para

uzéajni'inë' libí'ili' le raca quia', en utipë' ládxi'li'. ⁹ Onésimo, bóchi'ru' na' nabábalenë' libí'ili' sa'yéajlenë' lë' tsözxón. Náquië' ca' bóchi'ru' nadxí'iru'-në', en réajlë'ë Xanru'. Chopë' ni ulu'siyönnë' libí'ili' yúgu'të le raca ni.

¹⁰ Aristarco, bönni' na' yú'ulenë' neda' tsözxón lidxi guíë rugapë' Dios libí'ili'. Bi'i Marcos, bi'i bönni' queénu nigula zanë' Bernabé rugápabi' Dios ca' libí'ili'. Chigudxa' libí'ili' bi gunli' queébi' bi'i Marcos na'. Channö huídabi' ga zóali', guli'gún-bi' bal. ¹¹ Bönni' ni lë' Jesús, en zoa ia'tú lë' Justo lësca' rugapë' Dios libí'ili'. Nacuá' zían bönachi judío ta'yéajlë' Cristo, pero tsónnasë' ni ladaj bönachi judío tunë' dxin que le rinná bë'ë Dios tsözxón len neda', en tu'huí' zxóndë'ë neda'. ¹² Epafras, bönni' ni nababë' ca' libí'ili' rugapë' Dios libí'ili'. Náquië' huen dxin queë' Cristo, en idú ládxi'ë rulidzë' Dios, en ráta'yutica'së' lahuë' gácalenë' libí'ili' para gácali' idú ládxi', en sóali' ca' sina' gunli' yúgu'të le ré'ëni quézinë' Dios. ¹³ Runa' ba nalí queë' Epafras na', ruí'ida' ládxi'ë libí'ili' enca' nupa nacuá' yödzö Laodicea, en nupa nacuá' yödzö Hierápolis. ¹⁴ Demas, enca' Lucas tu'gapë' Dios libí'ili'. Náquië' Lucas bönni' na' ruúnë' bönachi, ate' nadxí'iru'-në'.

¹⁵ Guli'gapa Dios bóchi'ru' nacu'ë Laodicea, enca' Ninfas, en bönachi queë' Cristo nacuá' lídxinu Ninfas na'. ¹⁶ Cate' údxi ulábalí' guichi ni ga ni' zóali', guli'gún ga ulu'laba le bönachi queë' Cristo nacuá' Laodicea. Buli'laba ca' libí'ili' guichi na' ila'söl-la' bönachi Laodicea na' queéli'. ¹⁷ Guli'guíë' Arquipo: “Bë' ládxi'u gunu' dxin na' budödë' Xanru' lu no'o.”

¹⁸ Neda', Pablo, ruzúaj caza' lu guichi dídza'do' ni, rnnía': Rugapa' Dios libí'ili'. Guli'tsöjné ca raca quia' nadzuna' lidxi guíë ni. Rinábida'-në' Dios uzá' ládxi'ë queéli' le naca dxi'a. ¡Ca' gaca!